

## ■ PUNTG DA VISTA

# Uschia na vai betg

Las duas organisaziuns linguistics Lia rumantscha e Pro Grigioni Italiano sco era il Departament d'educaziun, cultura e protecziun da l'ambient dal Grischun èn dischillus da la decisiun dal cussegl federal concernent la lescha da linguas. Per motivs politic-finanzials na vul il cussegl federal betg sutta metter al parlament il sboz per ina lescha federala davart las linguas nazionalas e la communicaziun tranter las cuminanze linguistics e renunziar cun quai ad ina lescha da linguas federala.

Il 1996, suenter che l'artitgel da linguas en la constituziun federala da lez temp (art. 116) è vegnì acceptà, han ins empermess ina lescha da linguas federala. Cun il «na» sorprendent dal cussegl federal al sboz da questa lescha croda ina pitga prevista e bain preparada per ina politica activa da linguas en noss pajais quadriling e per il dialog tranter las cuminanze linguistics. Il cussegl federal manchenta damai la chaschun da dar clers segns per il rinforzament da la quadrilinguitad. Il Grischun, il sulet chan-

tun triling da la Svizra e perquai pertutgà il pli fitg, ha tema che sias duas minoritads, la taliana e la rumantscha, na possian betg realisar projects urgents e gia suspendids.

La motivaziun dal cussegl federal che la confederaziun disponia gia uss dals instruments necessaris per cuntanscher las finamiras da la lescha da linguas, na po betg cuntentar. Malgrà tut la chapientscha per arguments politic-finanzials èsi a noss avis in pass en la faussa direcziun. Igl è era da temair che las duas pli pitschnas minoritads linguistics, il rumantsch ed il talian, vegnian tralashadas.

La lingua rumantscha ferma-main periclitada, ma era la lingua minoritara taliana dovrà ulterior sustegn. Las subvenziuns federalas annualas per mantegnair e promover la lingua e la cultura rumantscha e taliana per ils chantuns Grischun e Tessin na bastan betg pli per prender mesiras impurtantas a favur dal mantegniment da la lingua. Nus spegain perquai dal cussegl federal e

dal parlament ch'ins chattia vias per pudair realisar projects plansads ed urgents da las duas minoritads linguistics. La Pro Grigioni Italiano e la Lia rumantscha ensemen cun il Departament d'educaziun, cultura e protecziun da l'ambient speran sin quellas forzas che dattan a lunga vista prioritad a la coesiun interna da la Svizra ed al rinforzament da las minoritads e pretendan che la lescha da linguas vegnia puspè integrada en la planisaziun da la legislatura.

*Lia rumantscha*